

**Tuesday, March 25, 2025**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**REGIONAL NEWS BULLETIN**

**(MIDDAY)**

## **MZU CONVOCATION**

Mizoram University convocation vawi 19-na vawiin khan hman a ni a, zirlai hlawhtling 7,724 te hnenah degree hlan a ni.

He hunah hian Mizoram Governor General (Dr) Vijay Kumar Singh chu khuallian niin, Chief Minister Pu Lalduhoma chu khualzahawm a ni a. Zirlai hlawhtlingte hnenah Degree, Gold Medal leh lawmman (Prize) te hlan hmasak a ni.

Khuallian, Mizoram Larsap General (Dr) Vijay Kumar Singh chuan thiamna nei tura tumruhna leh chhelna nena beitu zirlai hlawhtling thar zawng zawngte chu a lawmpui thu a sawi a, ram chhung khawchhak tawpa awm, University atanga zirlai 7,724 te hnena degree hlan a ni chu ropui a tih thu a sawi. Larsap chuan Mizoram University chu kum 2001-a central university-a hlan kai a nih hnuah thiamna (academy) leh zirchianna (research) ah chauh ni lovin khawtlang nun hmasawna leh state chhung hmun hrang hrang tihchak lamah a thawh hlawk hle tih a sawi a, Mizoram University chuan hmasawn zelin, ram chhunga zirna in sang tehna hrang hrangah dinmun tha tak tak a chang chu fakawm a tih thu a sawi a, NIRF-in ram chhunga university tha zual a thlan zingah 77-na a ni pha a, Times of India-in Higher Education Impact Rankings 2024-a tihchhuahah Mizoram University chuan hmarchhak bialah 1-na a hauh a, Indian Institutional Ranking Framework, IIRF-in kum 2024-a central university tha zual 20 a thlanah Mizoram university chuan hmarchhak bialah 2-na a hauh chu lawmawm a tih thu a sawi a.

Mizoram univesristy-a zirtirtu hna thawk mek mi 5 te leh research scholar pakhat chu Stanford University-in khawvela scientist tha zual a thlan chhuah zaa 2 zingah an tel tih a lo hria a, chu chuan Mizoram university chu khawvel huap zirna tha ni turin hmalam hun a nei eng hle tih a lantir tih a sawi a, Larsap chuan Mizoram university campus chu boruak leh leilung tana hlauhawm thlen lo, eco-friendly campus a nih thu sawiin, India-in green energy nei tura hma a lakna nen a inmil hle a ni a ti a, Mizoram university chu hmarchhak biala zirna in tha tak a nih chhunzawm zel a beisei tih a sawi a, zirlai hlawhtlingte chu an kalna zel turah duhsakna a hlan a ni.

Byte: Governor

Vawiina degree hlan takte hi - Doctor of Philosophy - 104, Master's Degree - 567, Master's Professional - 149, Bachelor's Degree - 143, Bachelor's Professional (B. Tech., B. Pharm, Nursing, OOT, RIT, MLT, LLB, BBA, B. Arch, B.Voc, BSW, B.Ed MMP, B.Ed.) - 176 niin a hmuna degree dawngtu kal zat chu 1192 an ni .

A hmuna kal ve thei lo degree dawng zat chu 6532 niin tun tum convocation bika degree dawngtu zat hi zirlai 7724 an ni.  
Zirlai hlawhtling degree nei thar zingah hian Gold Medalist 51 leh Book Prize Winner mi 3 an awm bawk a ni. Vawiin inkhawmah hian Mizoram University Vice-Chancellor, Prof. Dibakar Chandra Deka, khualzahawm Chief Minister Pu Lalduhoma leh Registrar, Professor Lalnundanga te pawhin thu an sawi a ni.  
(Corr: Maremi)



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.  
Zanin dar 6 leh a chanve-ah Chanchinthar hi puan leh a ni ang.



## NHM

New Delhi-a World TB Day Commemoration hman-ah Mizoram chuan Exemplary Performance in TB Mukht Gram Panchayat Initiative lawmman a dawng.

Lawmman hi nimin khan Mizoram aiawhin National Health Mission - Mission Director Dr. Lily Chhakchhuak chuan Union Health Minister J.P. Nadda hnen atangin a dawng a, he hunah hian NHM State TB Officer Dr. Zochhuanawmi a tel bawk.

Health Minister Pi Lalrinpuii chuan NHM in hetiang lawmman a dawng thei hi lawmawm a tiin, National TB Elimination Programme (NTEP) thawktute, doctor leh nurse te, Health & Wellness Officers, Health Workers leh thawktu dangte thawhrimnaah lawmthu a sawi.

Nikum December ni 7 atang khan Mizoramah ni za chung awh 100 TB Campaign chu District 4 – Aizawl, Mamit, Serchhip leh Champhaiah te kalpui niin, hemi chung hian mi 61,859 ten TB an vei leh vei loh endik an ni a, mi 26-in TB natna an vei tih hmuhchhuah a ni.

TB endikna Camp hmun hrang hrang-ah vawi 874 buatsaih a ni a, NAAT a endik mi 4,662 awmin X-ray-a endik mi 10,886 an awm a, Microscopy in mi 398 sample endik a ni bawk. Nutritional Poshan Yojana chu TB damlo zingah 1,177 pek an ni bawk.

Nimin vek khan Mizorama District hrang hrangah World TB Day hman a ni a. Aizawla hun hmanah Health Minister Pi Lalrinpuii chuan TB natna chu khawvel huapin WHO chuan kum 2030-ah umbo a tum a, India ram chuan hei aia kum 5 a hma kum 2025-ah umbo a tum thu a sawi a. He umbo tumna hi a hlawhtlin theihna turin hmalakna hrang hrang Active Case Finding campaign te, TB Free village te, chaw tha hmanga TB damlo chhawmdawlina Nikshay Mitra te, Ni 100 chhunga TB umbo beihpui thlak mek te chu hmalakna langsar tak a nih thu a sawi a ni.

Mizoramah hian TB vei awm lohna khua (TB free village) 122 a awm mek a ni.  
(DIPR)



POLICE PR

Mizoram Police chuan nimin tlai khan tun hnaia an hmalakna hrang hrang an puang a, chung zingah chuan caffeine ni ngeia hriat thil phut var (white powder) bûr (barrel) 40 an man thu an sawi.

Police thu chhuaha a lan danin, Champhai police-te chuan March ni 23 khan Khankawn Police check gate-ah truck MZ-01 K-5785 atangin caffeine ni ngeia hriat thil phut var (white powder) bûr an man a. A vaiin kg. 3,000 vel niin a hlutna hi cheng nuai Rs 45 vel hûa chhût a ni a; Champhai Kanan Veng mi pahnih K. Lalthianghlima (31) leh Zonunsangi (30) te ta niin, truck khalhtu chu Melbuk mi Emmanuela (22) a ni. Caffeine-te chu methamphetamine siamna atana hman tur ni ngeia hriat a nih thu an tarlang bawk a ni.

Lunglei police-te pawhin March 22 khan Lunglei Chanmari-ah silai mu (7.62mm) 7,200, gelatin detonator bâwm 6 leh a hrui (primary cord/cordex) hlûm 12 leh fuse wire hlûm 2 an man.

Ralthuam kaihnawihah hian Sairep mi pahnih (Lunglei Electric Venga cheng mek) F. Laltlanmawii (40) leh Zonunpari; New Siaha mi Zakaria Lalramdinpuia (38) leh Lalremtluanga (47) te an man a; Arms Act hnuaiah thubuai ziahluh a ni.

(PR)

